




Հարցուպատասխան Հաշմանդամություն ունեցող անձանց իրավունքների մասին կոնվենցիայի վերաբերյալ

Այս հարցուպատասխանը մշակվել է Եվրոպական միության ֆինանսական աջակցությամբ: Բովանդակության համար պատասխանատվություն է կրում Ներառական իրավական բարեփոխումների կոալիցիան, և պարտադիր չէ, որ արտահայտի Եվրոպական միության տեսակետները:

Ծրագիրն իրականացվում է «Ագաթ» հաշմանդամություն ունեցող կանանց իրավունքների պաշտպանության կենտրոն ՆԿ-ի կողմից՝ ի դեմս Ներառական իրավական բարեփոխումների կոալիցիայի:





Որո՞նք են հաշմանդամություն ունեցող անձանց մարդու իրավունքները:


Հասարակության բոլոր անդամներն ունեն մարդու նույն իրավունքները: Դրանք ներառում են քաղաքացիական, մշակութային, տնտեսական, քաղաքական և սոցիալական իրավունքները: Այս իրավունքների օրինակներն են՝

- օրենքի առաջ հավասարություն առանց խտրականության
- կյանքի, ազատության և անվտանգության իրավունք
- օրենքի առջև հավասար ճանաչում և գործունակություն
- ազատություն խոշտանգումներից
- ազատություն շահագործումից, բռնությունից և չարաշահումից
- ֆիզիկական և հոգեկան անձեռնմխելիության նկատմամբ հարգանքի իրավունք
- տեղաշարժի ազատություն և քաղաքացիություն
- համայնքում ապրելու իրավունք
- արտահայտվելու և կարծիքի ազատություն
- հարգանք գաղտնիության նկատմամբ
- հարգանք տան և ընտանիքի նկատմամբ
- կրթության իրավունք
- առողջության իրավունք

- աշխատելու իրավունք
- բավարար կենսամակարդակի իրավունք
- քաղաքական և հասարակական կյանքին մասնակցելու իրավունք
- մշակութային կյանքին մասնակցելու իրավունք

Հաշմանդամություն ունեցող բոլոր անձինք իրենց իրավունքներն իրացնելիս չպետք է ենթարկվեն խտրականության: Սա նշանակում է, որ ոչ ոք իր փաստացի կամ ենթադրյալ հաշմանդամության հիման վրա չպետք է խտրականության ենթարկվի: Բացի այդ, հաշմանդամություն ունեցող անձինք չպետք է ենթարկվեն խտրականության նաև ցանկացած այլ հիմքով, ինչպիսիք են ռասան, մաշկի գույնը, սեռը, լեզուն, կրոնը, քաղաքական կամ այլ կարծիքը, ազգային կամ սոցիալական ծագումը, սեփականությունը, ծնունդը կամ այլ կարգավիճակը:






Ի՞նչ է «Հաշմանդամություն ունեցող անձանց իրավունքների մասին» կոնվենցիան:

Հաշմանդամություն ունեցող անձանց իրավունքների մասին կոնվենցիան միջազգային պայմանագիր է, որը սահմանում է հաշմանդամություն ունեցող անձանց իրավունքները, ինչպես նաև Կոնվենցիայի մասնակից պետությունների պարտավորությունները՝ խթանելու, պաշտպանելու և ապահովելու այդ իրավունքները: Կոնվենցիան սահմանում է նաև իրականացման երկու մեխանիզմ

1. Հաշմանդամություն ունեցող անձանց իրավունքների հարցերով կոմիտե, որը ստեղծվել է իրականացման մոնիտորինգի համար, և
2. Մասնակից պետությունների համաժողով, որը ստեղծվել է իրականացման հետ կապված հարցերը քննարկելու համար:


Պետությունները Կոնվենցիայի շուրջ բանակցություններ են վարել քաղաքացիական հասարակության կազմակերպությունների, մարդու իրավունքների ազգային ինստիտուտների և միջկառավարական կազմակերպությունների մասնակցությամբ: Միավորված ազգերի կազմակերպության Գլխավոր ասամբլեան ընդունել է Կոնվենցիան 2006 թվականի դեկտեմբերի 13-ին և այն բացվել է ստորագրման համար 2007 թվականի մարտի 30-ին: Կոնվենցիան վավերացնող պետությունները իրավաբանորեն պարտավոր են հարգել Կոնվենցիայի չափանիշները: Այլ պետությունների համար Կոնվենցիան ներկայացնում է միջազգային չափանիշ, որին նրանք պետք է ձգտեն հարգել:



Ի՞նչ է Կոնվենցիայի Կամընտիր արձանագրությունը:

Կամընտիր արձանագրությունը ևս միջազգային պայմանագիր է: Կամընտիր արձանագրությունը սահմանում է երկու ընթացակարգ՝ ուղղված Կոնվենցիայի իրականացմանը և մշտադիտարկման ուժեղացմանը: Առաջինը բողոքների անհատական հաղորդման ընթացակարգն է, որը թույլ է տալիս անհատներին բողոքներ ներկայացնել Կոմիտե՝ իրենց իրավունքների խախտման վերաբերյալ պահանջներով: Երկրորդը հետաքննության ընթացակարգ է, որը Կոմիտեին տալիս է Կոնվենցիայի կոպիտ կամ համակարգված խախտումների վերաբերյալ հետաքննություն իրականացնելու իրավասություն:






Ի՞նչ այլ միջազգային փաստաթղթեր են ճանաչում հաշմանդամություն ունեցող անձանց իրավունքները:

Վերջին տասնամյակների ընթացքում պետությունները հատուկ գործիքներ են ընդունել հաշմանդամություն ունեցող անձանց իրավունքները պաշտպանելու և խթանելու համար: Այդ փաստաթղթերից են՝

- Հաշմանդամ անձանց իրավունքների մասին հռչակագիրը (1995 թ.).
- Հաշմանդամ անձանց վերաբերյալ գործողությունների համաշխարհային ծրագիր (1981 թ.).
- Հոգեկան հիվանդությամբ անձանց պաշտպանության և հոգեկան առողջության խնամքի բարելավման սկզբունքները (1991 թ.).
- Հաշմանդամություն ունեցող անձանց հնարավորությունների հավասարեցման ստանդարտ կանոններ (1993 թ.):

Թեև ուղեցույցները, հռչակագրերը, սկզբունքները, բանաձևերը և այլ փաստաթղթեր իրավաբանորեն պարտադիր չեն, դրանք արտահայտում են պետությունների բարոյական և քաղաքական պարտավորությունը և կարող են օգտագործվել որպես օրենսդրություն ընդունելու կամ հաշմանդամություն ունեցող անձանց վերաբերյալ քաղաքականություն մշակելու ուղեցույց: Կարևոր է նշել, որ հոգեկան առողջության խնդիր ունեցող անձանց պաշտպանության և հոգեկան առողջության խնամքի բարելավման սկզբունքների որոշ դրույթներ քննադատության են ենթարկվել: Այժմ Հաշմանդամություն ունեցող անձանց իրավունքների մասին կոնվենցիան ավելի բարձր չափանիշներ է սահմանել նաև այդ հարցում:



Բացի Հաշմանդամություն ունեցող անձանց իրավունքների մասին կոնվենցիայից, մարդու իրավունքներին ո՞ր կոնվենցիաներն են առնչվում:

Մարդու իրավունքների բոլոր կոնվենցիաները վերաբերում են բոլորին, ներառյալ հաշմանդամություն ունեցող անձանց: Տնտեսական, սոցիալական և մշակութային իրավունքների մասին միջազգային դաշնագիրը և Քաղաքացիական և քաղաքական իրավունքների մասին միջազգային դաշնագիրը պաշտպանում են ցանկացած հիմքով խտրականությունից: Կան նաև մարդու իրավունքների կոնվենցիաներ, որոնք վերաբերում են խտրականությանը: Օրինակ՝ Կանանց նկատմամբ խտրականության բոլոր ձևերի վերացման մասին կոնվենցիան: Կան նաև կոնվենցիաներ հատուկ խնդիրների կամ մարդկանց խմբերի իրավունքների մասին, ինչպիսիք են երեխաները կամ աշխատանքային միգրանտները:


Մարդու իրավունքների հիմնական պայմանագրերը հետևյալն են.

- Տնտեսական, սոցիալական և մշակութային իրավունքների մասին միջազգային դաշնագիր
- Քաղաքացիական և քաղաքական իրավունքների մասին միջազգային դաշնագիրը
- Ռասայական խտրականության բոլոր ձևերի վերացման մասին միջազգային կոնվենցիան
- Խոշտանգումների դեմ կոնվենցիա
- Կանանց նկատմամբ խտրականության բոլոր ձևերի վերացման մասին կոնվենցիան
- Երեխայի իրավունքների մասին կոնվենցիան
- Բոլոր միգրանտ աշխատողների և նրանց ընտանիքների անդամների իրավունքների պաշտպանության միջազգային կոնվենցիա
- Բռնությամբ անհետացած բոլոր անձանց պաշտպանության մասին միջազգային կոնվենցիա
- Հաշմանդամություն ունեցող անձանց իրավունքների մասին կոնվենցիան:

Մարդու իրավունքների բոլոր կոնվենցիաները ներառում են խտրականությունից պաշտպանող դրույթ: Այնուամենայնիվ, այս կոնվենցիաներից միայն մեկը՝ Երեխայի իրավունքների մասին կոնվենցիան է հատուկ ճանաչում հաշմանդամության հիմքով խտրականությունից պաշտպանվելու անհրաժեշտությունը:

Այնուամենայնիվ, բոլոր կոնվենցիաները հաշմանդամությունն անուղղակիորեն համարում են որպես խտրականությունից պաշտպանության հիմք: Սա պարզ է դարձնում, որ հաշմանդամություն ունեցող անձինք չպետք է խտրականության ենթարկվեն այս կոնվենցիաների կիրառման ժամանակ: Այսպիսով, կանանց նկատմամբ խտրականության բոլոր ձևերի վերացման մասին կոնվենցիան, օրինակ, վերաբերում է բոլոր կանանց, այդ թվում հաշմանդամություն ունեցող կանանց:






Ինչո՞ւ է անհրաժեշտ Հաշմանդամություն ունեցող անձանց իրավունքների մասին Կոնվենցիա ունենալ:

Կոնվենցիան անհրաժեշտ է հստակ վերահաստատելու համար, որ հաշմանդամություն ունեցող անձանց իրավունքները մարդու իրավունքներ են և ամրապնդելու այդ իրավունքների նկատմամբ հարգանքը: Թեև գործող մարդու իրավունքների կոնվենցիաները զգալի ներուժ ունեն հաշմանդամություն ունեցող անձանց իրավունքները խթանելու և պաշտպանելու համար, բայց պարզ դարձավ, որ այդ ներուժը չի օգտագործվում: Գործնականում հաշմանդամություն ունեցող անձինք շարունակում էին զրկվել իրենց մարդու իրավունքներից և մնում էին հասարակության լուսանցքում աշխարհի բոլոր մասերում: Հաշմանդամություն ունեցող անձանց նկատմամբ այս շարունակական խտրականությունն ընդգծեց իրավաբանորեն պարտադիր փաստաթուղթ ընդունելու անհրաժեշտությունը, որը սահմանում է պետությունների իրավական պարտավորությունները՝ խթանելու և պաշտպանելու հաշմանդամություն ունեցող անձանց իրավունքները:





ԻՆՋՈՒ Է ԿՈՆՎԵՆՑԻԱՆ ԵԳԱԿԻ:

Կոնվենցիան 21-րդ դարի մարդու իրավունքների առաջին կոնվենցիան է և հաշմանդամություն ունեցող անձանց իրավունքների համապարփակ պաշտպանությամբ առաջին իրավաբանորեն պարտադիր փաստաթուղթը: Թեև Կոնվենցիան չի սահմանում մարդու նոր իրավունքներ, այն շատ ավելի հստակորեն սահմանում է պետությունների պարտավորությունները՝ խթանելու, պաշտպանելու և ապահովելու հաշմանդամություն ունեցող անձանց իրավունքները:


Այսպիսով, Կոնվենցիան ոչ միայն հստակեցնում է, որ պետությունները չպետք է խտրականություն գործեն հաշմանդամություն ունեցող անձանց նկատմամբ, այլև սահմանում է բազմաթիվ քայլեր, որոնք պետությունները պետք է ձեռնարկեն բարենպաստ միջավայր ստեղծելու համար, որպեսզի հաշմանդամություն ունեցող անձինք կարողանան իրական հավասարություն վայելել հասարակության մեջ:

Օրինակ՝ Կոնվենցիան պետություններից պահանջում է միջոցներ ձեռնարկել ֆիզիկական միջավայրի և տեղեկատվական և հաղորդակցական տեխնոլոգիաների մատչելիությունն ապահովելու համար: Նմանապես, պետությունները պարտավորություններ ունեն իրազեկության բարձրացման, արդարադատության մատչելիության խթանման, անհատական շարժունակության ապահովման և Կոնվենցիային առնչվող առանձին տվյալների հավաքագրման հետ կապված:

Այսպիսով՝ Կոնվենցիան շատ ավելի խորն է անցնում, քան մարդու իրավունքների այլ պայմանագրերը՝ սահմանելով այն քայլերը, որոնք պետությունները պետք է ձեռնարկեն խտրականությունն արգելելու և բոլորի համար հավասարություն ձեռք բերելու համար:

Կոնվենցիան ընդունում է միջազգային համագործակցության կարևորությունը և դրա խթանումը՝ աջակցելու ազգային իրականացման ջանքերին: Այս առումով նորամուծությունը վերաբերում է հատուկ հղումների այն գործողություններին, որոնք միջազգային հանրությունը կարող է ձեռնարկել միջազգային համագործակցությունը խթանելու համար, ինչպիսիք են՝

- ապահովել, որ միջազգային զարգացման ծրագրերը ներառեն և մատչելի լինեն հաշմանդամություն ունեցող անձանց համար.
- նպաստել և աջակցել կարողությունների զարգացմանը.
- համագործակցել հետազոտությունների ոլորտում և գիտական և տեխնիկական գիտելիքների հասանելիության հարցերում.
- անհրաժեշտության դեպքում տեխնիկական և տնտեսական աջակցության տրամադրել միմյանց:




Ի՞նչ բովանդակություն ունի Հաշմանդամություն ունեցող անձանց իրավունքների մասին կոնվենցիան:

Կոնվենցիան սահմանում է հաշմանդամություն ունեցող անձանց մարդու իրավունքները և պետությունների պարտավորությունները՝ խթանելու, պաշտպանելու և ապահովելու այդ իրավունքները, ինչպես նաև իրականացմանն ու մշտադիտարկմանն աջակցելու մեխանիզմները: Բովանդակությունը կարելի է բաժանել հետևյալ կերպ.

- Նախաբան – Տալիս է Կոնվենցիայի ընդհանուր ենթատեքստը և բացահայտում կարևոր հիմնախնդիրները.
- Նպատակը – Սահմանում է Կոնվենցիայի նպատակը, որն է՝ նպաստել, պաշտպանել և ապահովել հաշմանդամություն ունեցող բոլոր անձանց մարդու բոլոր իրավունքների և հիմնական ազատությունների լիարժեք և հավասար իրացումը և նպաստել նրանց բնածին արժանապատվության հարգմանը.
- Սահմանումներ – Ներկայացնում է Կոնվենցիայում օգտագործվող հիմնական տերմինները, այն է՝ հաղորդակցություն, լեզու, հաշմանդամության հիմքով խտրականություն, խելամիտ հարմարեցում և համընդհանուր ձևավորում.
- Ընդհանուր սկզբունքներ - Սահմանում է այն չափանիշները կամ հրամայականները, որոնք կիրառվում են Կոնվենցիայի բոլոր իրավունքներից օգտվելու համար, ինչպիսիք են խտրականության բացառման և հավասարության սկզբունքը.
- Պարտավորություններ – Պարզաբանում է այն քայլերը, որոնք պետությունները պետք է ձեռնարկեն՝ նպաստելու, պաշտպանելու և ապահովելու Կոնվենցիայի իրավունքները.
- Հատուկ իրավունքներ – Նկարագրում է առկա քաղաքացիական, մշակութային, տնտեսական, քաղաքական և սոցիալական մարդու իրավունքները՝ հաստատելով, որ հաշմանդամություն ունեցող անձինք նույնպես ունեն այդ իրավունքները.
- Խթանող միջոցառումներ – Սահմանում է կոնկրետ քայլեր, որոնք պետությունները պետք է ձեռնարկեն՝ ապահովելու համար բարենպաստ միջավայր մարդու իրավունքներից օգտվելու համար, մասնավորապես՝ իրազեկության բարձրացում, մատչելիության ապահովում, պաշտպանություն և անվտանգություն ռիսկային և հումանիտար արտակարգ իրավիճակներում, արդարադատության մատչելիության խթանում, անհատական շարժունակության ապահովում, վերականգնման հնարավորություն, վիճակագրության և տվյալների հավաքում.

- Միջազգային համագործակցություն – Նշում է միջազգային հանրության համատեղ աշխատանքի կարևորությունը՝ ապահովելու հաշմանդամություն ունեցող անձանց իրավունքների լիարժեք իրացումը.
- Իրականացում և մշտադիտարկում – Պահանջում է պետություններից ստեղծել ազգային մեխանիզմներ Կոնվենցիայի մշտադիտարկման և իրականացման համար և ստեղծում է Մասնակից պետությունների համաժողով, որը քննարկում է Կոնվենցիայի կատարման հետ կապված ցանկացած հարց, և Հաշմանդամություն ունեցող անձանց իրավունքների կոմիտե՝ Կոնվենցիայի մշտադիտարկման համար.
- Եզրափակիչ դրույթներ – Սահմանում են ստորագրման, վավերացման, ուժի մեջ մտնելու ընթացակարգերը և Կոնվենցիային առնչվող այլ ընթացակարգային պահանջներ.






Որո՞նք են Կոնվենցիայի սկզբունքները:

Հոդված 3-ը սահմանում է ընդհանուր սկզբունքները, որոնք վերաբերում են հաշմանդամություն ունեցող անձանց իրավունքների իրականացմանը: Դրանք են՝

- հարգանք արժանապատվության, անհատի ինքնավարության, սեփական ընտրությունը կատարելու ազատության և անձի անկախության իրավունքի նկատմամբ.
- խտրականության բացառում.
- հանրային կյանքում լիակատար և արդյունավետ մասնակցություն և ներառում.
- հարգանք տարբերության նկատմամբ և հաշմանդամություն ունեցող անձանց որպես մարդկային բազմազանության և մարդկության մաս ընդունելը,
- հնարավորությունների հավասարություն.
- մատչելիություն.
- հավասարություն տղամարդկանց և կանանց միջև.
- հարգանք հաշմանդամություն ունեցող երեխաների զարգացող կարողությունների նկատմամբ և հարգանք հաշմանդամություն ունեցող երեխաների՝ իրենց ինքնությունը պահպանելու իրավունքի նկատմամբ:





Արդյոք «հաշմանդամություն» և «հաշմանդամություն ունեցող անձինք» հասկացությունները սահմանված են Կոնվենցիայում:

Կոնվենցիան չի սահմանում «հաշմանդամություն» կամ «հաշմանդամություն ունեցող անձանց» հասկացությունները: Այնուամենայնիվ, Նախաբանի և 1-ին հոդվածի տարրերը ուղեկիչ են հանդիսանում Կոնվենցիայի կիրառումը պարզաբանելու համար:

«Հաշմանդամություն» – Նախաբանն ընդունում է, որ «հաշմանդամությունը զարգացող հասկացություն է, և որ այն արդյունք է այնպիսի փոխազդեցության, որը տեղի է ունենում առողջական խնդիրներ ունեցող մարդկանց և վերաբերմունքի ու շրջապատի սահմանափակումների միջև, որոնք խոչընդոտում են նրանց՝ մյուսների հետ հավասար հիմունքներով լիարժեք ու արդյունավետ մասնակցությանը հասարակական կյանքում»:

«Հաշմանդամություն ունեցող անձինք» – 1-ին հոդվածում ասվում է, որ «հաշմանդամություն ունեցող անձինք ներառում են նրանց, որոնք ունեն երկարատև ֆիզիկական, հոգեկան, մտավոր և զգայական խանգարումներ, որոնք տարբեր արգելքների հետ փոխազդեցության արդյունքում կարող են խոչընդոտել, որ նրանք լիակատար և արդյունավետ մասնակցեն հասարակական կյանքին մյուսների հետ հավասար հիմունքներով»:


Այս դրույթների մի քանի տարրեր կարևոր են ընդգծելու համար: Նախ, կա գիտակցում, որ «հաշմանդամությունը» զարգացող հասկացություն է, որն առաջանում է վերաբերմունքի և միջավայրի խոչընդոտներից, որոնք խոչընդոտում

Են հաշմանդամություն ունեցող անձանց մասնակցությունը հասարակությանը:
Հետևաբար, «հաշմանդամություն» հասկացությունը հաստատուն չէ և կարող է փոփոխվել՝ կախված հասարակությունից հասարակությունում տիրող միջավայրից:

Երկրորդ, հաշմանդամությունը համարվում է ոչ թե որպես բժշկական վիճակ, այլ ավելի շուտ բացասական վերաբերմունքի կամ ոչ բարենպաստ միջավայրի փոխազդեցության արդյունք որոշակի անձանց վիճակի հետ: Ի տարբերություն հաշմանդամություն ունեցող անձանց «ուղղելու» ջանքերին՝ վերացնելով վերաբերմունքային և միջավայրային խոչընդոտներն անձինք կարող են մասնակցել որպես հասարակության ակտիվ անդամներ և օգտվել իրենց իրավունքների ամբողջ շրջանակից:

Երրորդ, Կոնվենցիան չի սահմանափակում կոնկրետ անձանց շրջանակ: Ավելի շուտ, Կոնվենցիան սահմանում է, որ կոնվենցիայի առաջնային թիրախը երկարաժամկետ ֆիզիկական, հոգեկան, մտավոր և զգայական հաշմանդամություն ունեցող անձինք են: Սակայն «ներառում է» ձևակերպումը նշանակում է, որ դա սպառնիչ ցանկ չէ և մասնակից պետությունները կարող են նաև պաշտպանություն ապահովել այլոց համար, օրինակ՝ կարճաժամկետ հաշմանդամություն ունեցող անձանց կամ ովքեր թեև չունեն հաշմանդամություն, բայց ընկալվում են այդպիսին:






Որո՞նք են Կոնվենցիայում սահմանված հատուկ իրավունքները:

Կոնվենցիան վերահաստատում է, որ հաշմանդամություն ունեցող անձինք օգտվում են նույն մարդու իրավունքներից, ինչ բոլորը: Կոնվենցիայով ճանաչված հատուկ իրավունքներն են.


- օրենքի առաջ հավասարություն առանց խտրականության
- անձի կյանքի, ազատության և անվտանգության իրավունք
- օրենքի առաջ հավասար ճանաչում և գործունակություն
- ազատություն խոշտանգումներից
- ազատություն շահագործումից, բռնությունից և չարաշահումից
- ֆիզիկական և մտավոր անձեռնմխելիության նկատմամբ հարգանքի իրավունք
- տեղաշարժի ազատություն և քաղաքացիություն
- համայնքում ապրելու իրավունք
- արտահայտվելու և կարծիքի ազատություն
- հարգանք գաղտնիության նկատմամբ
- հարգանք տան և ընտանիքի նկատմամբ
- կրթության իրավունք
- առողջության իրավունք
- աշխատելու իրավունք
- համապատասխան կենսամակարդակի իրավունք
- քաղաքական և հասարակական կյանքին մասնակցելու իրավունք
- մշակութային կյանքին մասնակցելու իրավունք:



Ի՞նչ պարտավորություններ ունեն Կոնվենցիայի մասնակից պետությունները:

Կոնվենցիան սահմանում է ընդհանուր և հատուկ պարտավորություններ մասնակից պետությունների համար՝ կապված հաշմանդամություն ունեցող անձանց իրավունքների հետ: Ընդհանուր պարտավորությունների առումով պետությունները պետք է.


- ընդունեն հաշմանդամություն ունեցող անձանց մարդու իրավունքների պաշտպանությանն ուղղված օրենսդրական և վարչական միջոցներ.
- ընդունեն օրենսդրական և այլ միջոցներ խտրականությունը վերացնելու համար.
- պաշտպանեն և խթանեն հաշմանդամություն ունեցող անձանց իրավունքները բոլոր քաղաքականություններում և ծրագրերում.
- դադարեցնեն ցանկացած պրակտիկա, որը խախտում է հաշմանդամություն ունեցող անձանց իրավունքները.
- ապահովեն, որ պետական հատվածը հարգի հաշմանդամություն ունեցող անձանց իրավունքները.
- ապահովեն, որ մասնավոր հատվածը և անհատները հարգեն հաշմանդամություն ունեցող անձանց իրավունքները.
- ձեռնարկեն հաշմանդամություն ունեցող անձանց համար մատչելի ապրանքների, ծառայությունների և տեխնոլոգիաների հետազոտություն և զարգացում և խրախուսեն մյուսներին նման հետազոտություններ իրականացնել.
- տրամադրեն մատչելի տեղեկատվություն հաշմանդամություն ունեցող անձանց աջակցող տեխնոլոգիաների մասին.
- նպաստեն հաշմանդամություն ունեցող անձանց հետ աշխատող մասնագետների և անձնակազմի համար Կոնվենցիայի իրավունքների վերաբերյալ ուսուցմանը.
- խորհրդակցեն և ներգրավեն հաշմանդամություն ունեցող անձանց օրենսդրության և քաղաքականության մշակման և իրականացման և նրանց վերաբերող որոշումների կայացման գործընթացներում:



Ինչպե՞ս է մշտադիտարկում Կոնվենցիան:


Կոնվենցիան պահանջում է մշտադիտարկել ինչպես ազգային, այնպես էլ միջազգային մակարդակով: Ազգային մակարդակով Կոնվենցիան պետություններից պահանջում է, իրենց իրավական և վարչական համակարգերին համապատասխան պահպանել, ամրապնդել, նշանակել կամ ստեղծել Կոնվենցիայի կիրարկումը խթանելու, պաշտպանելու և մշտադիտարկելու համար շրջանակ:


Միջազգային մակարդակով Կոնվենցիան ստեղծել է Հաշմանդամություն ունեցող անձանց իրավունքների կոմիտե, որը վերանայում է պետությունների կողմից ներկայացված պարբերական զեկույցները Կոնվենցիայի իրականացման ուղղությամբ իրենց ձեռնարկած քայլերի վերաբերյալ: Կոմիտեն նաև իրավասու է ուսումնասիրելու առանձին հաղորդումներ և անցկացնելու հետաքննություններ այն պետություններում, որոնք ճանաչել են Կոմիտեի լիազորությունը՝ վավերացնելով կամընտիր արձանագրությունը:



Ինչպե՞ս է ազգային մակարդակում իրականացվում Կոնվենցիան:

Կոնվենցիան խթանելու, պաշտպանելու և մշտադիտարկելու համար «ազգային շրջանակ» հասկացությունը համեմատաբար ընդհանրական է: Կոնվենցիան ընդունում է, որ նման շրջանակները կարող են տարբերվել երկրից երկիր՝ թույլ տալով ճկունություն յուրաքանչյուր պետության իրավական և վարչական համակարգին համապատասխան: Այնուամենայնիվ, Կոնվենցիան նաև պահանջում է, որ ցանկացած մարմին, որը ստեղծվի, պետք է անկախ լինի: Սովորաբար, ազգային շրջանակները ենթադրում են առնվազն մարդու իրավունքների ազգային անկախ ինստիտուտի ստեղծում, ինչպիսին է Մարդու իրավունքների հանձնաժողովը կամ օմբուդսմենի գրասենյակը: Այնուամենայնիվ, շրջանակը կարող է պարունակել այլ տարրեր, ինչպիսիք են դատարանները:






Ի՞նչ է Հաշմանդամություն ունեցող անձանց իրավունքների հարցերով կոմիտեն:

Հաշմանդամություն ունեցող անձանց իրավունքների հարցերով կոմիտեն անկախ փորձագետների մարմին է, որը մշտադիտարկում է պետությունների կողմից Կոնվենցիայի կատարումը: Կոմիտեն բաղկացած է 18 փորձագետներից: Մասնակից պետությունները փորձագետներին ընտրում են՝ ելնելով մարդու իրավունքների և հաշմանդամության ոլորտում նրանց փորձից, ինչպես նաև՝ հաշվի առնելով արդար աշխարհագրական ներկայացվածությունը, քաղաքակրթության և իրավական համակարգերի տարբեր ձևերի ներկայացվածությունը, գենդերային հավասարակշռությունը և հաշմանդամություն ունեցող փորձագետների մասնակցությունը:


Կոմիտեն պարբերաբար ուսումնասիրում է պետությունների կողմից պատրաստված զեկույցները Կոնվենցիայի իրականացման ուղղությամբ նրանց կողմից ձեռնարկված քայլերի վերաբերյալ: Այն պետությունների համար, որոնք կամ ընտիր արձանագրության կողմ են, Կոմիտեն նաև իրավասու է բողոքներ ստանալ անհատներից իրենց իրավունքների ենթադրյալ խախտման վերաբերյալ և հետաքննություններ նախաձեռնել Կոնվենցիայի կոպիտ կամ համակարգված խախտումների դեպքում:



Ի՞նչ է Մասնակից պետությունների համաժողովը:

Կոնվենցիան նաև հիմնում է Մասնակից պետությունների համաժողով, որը պարբերաբար հանդիպում է Կոնվենցիայի իրականացման հետ կապված ցանկացած հարց քննարկելու նպատակով: Կոնվենցիան բաց է թողնում Մասնակից պետությունների կոնֆերանսի դերի ճշգրիտ բնույթը, թեև պարտականությունները ներառում են Հաշմանդամություն ունեցող անձանց իրավունքների կոմիտեի անդամների ընտրությունը և Կոնվենցիայի առաջարկվող փոփոխությունների քննարկումն ու ընդունումը:






Ի՞նչ է պարբերական հաշվետվությունը:

Կոնվենցիայի մասնակից յուրաքանչյուր պետություն պետք է Հաշմանդամություն ունեցող անձանց իրավունքների հարցերով կոմիտեին ներկայացնի նախնական համապարփակ զեկույց Կոնվենցիայի իրականացման ուղղությամբ ձեռնարկված միջոցառումների վերաբերյալ: Յուրաքանչյուր պետություն պետք է իր նախնական զեկույցը ներկայացնի այդ պետության համար Կոնվենցիայի ուժի մեջ մտնելուց հետո երկու տարվա ընթացքում: Նախնական հաշվետվությունը պետք է ներկայացնի.

- կոնվենցիայի իրականացման սահմանադրական, իրավական և վարչական դաշտի ստեղծումը.
- Կոնվենցիայի յուրաքանչյուր դրույթի իրականացման համար ընդունված քաղաքականություններն ու ծրագրերը.
- ներկայացնի ցանկացած առաջընթաց, որը ձեռք է բերվել հաշմանդամություն ունեցող անձանց իրավունքների իրացման գործում Կոնվենցիայի վավերացման և իրականացման արդյունքում:

Յուրաքանչյուր պետություն պետք է ներկայացնի հետագա հաշվետվություններ առնվազն չորս տարին մեկ անգամ կամ երբ Կոմիտեն պահանջի: Հետագա հաշվետվությունները պետք է.


- արձագանքի մտահոգություններին և այլ հարցերի, որոնք ընդգծվել են Կոմիտեի կողմից նախորդ զեկույցների վերաբերյալ իր ամփոփիչ դիտարկումներում.
- ցույց տան հաշվետու ժամանակահատվածում հաշմանդամություն ունեցող անձանց իրավունքների իրացման առաջընթացը.
- ընդգծեն ցանկացած խոչընդոտ, որին բախվել են Կառավարությունը և մյուս դերակատարները Կոնվենցիայի իրականացման ընթացքում հաշվետու ժամանակահատվածում:



Ջնարավոր է բողոքել Կոմիտեին, եթե իրավունքները խախտվել են:


Այո՛: Կոնվենցիայի կամընտիր արձանագրությունը սահմանում է հաղորդման անհատական ընթացակարգ, որը թույլ է տալիս արձանագրության մասնակից պետության անհատներին և խմբերին բողոքել Հաշմանդամություն ունեցող անձանց իրավունքների հարցերով կոմիտեին, որ պետությունը խախտել է Կոնվենցիայով նախատեսված իր պարտավորություններից մեկը: Բողոքը հաճախ ասում են «հաղորդում»: Կոմիտեն ուսումնասիրում է բողոքն ու պետության դիտարկումները և դրա հիման վրա ձևակերպում է իր տեսակետներն ու առաջարկությունները, դրանք ուղարկում է պետությանը և հրապարակում:






Կարո՞ղ է Կոմիտեն հետաքննություններ ձեռնարկել:

Այո՛: Կամընտիր արձանագրությունը սահմանում է հետաքննության ընթացակարգ: Եթե Կոմիտեն ստանա հավաստի տեղեկություն, որը վկայում է Կոնվենցիայի որևէ դրույթի՝ կամընտիր արձանագրության մասնակից պետության կողմից լուրջ կամ համակարգված խախտումների մասին, Կոմիտեն կարող է հրավիրել տվյալ պետությանն արձագանքելու այդ տեղեկությանը: Մասնակից պետության դիտարկումները և ցանկացած այլ հավաստի տեղեկություն դիտարկելուց հետո Կոմիտեն կարող է նշանակել իր անդամներից մեկին կամ մի քանիսին հետաքննություն անցկացնելու և հրատապ զեկույց հրապարակելու համար: Եթե պետությունը համաձայնի, Կոմիտեն կարող է այցելել տվյալ երկիր: Հետաքննությունն իրականացնելուց հետո Կոմիտեն իր եզրակացությունները փոխանցում է պետությանը, որը վեց ամիս ժամանակ ունի հետագա դիտարկումներ ներկայացնելու համար: Կոմիտեն ի վերջո ամփոփում է իր բացահայտումները, որոնք հրապարակում է: Կամընտիր արձանագրությունը վավերացնող պետությունը կարող է «հրաժարվել» հետաքննության ընթացակարգից:




Ո՞րն է քաղաքացիական հասարակության դերը մշտադիտարկման գործընթացում:


Քաղաքացիական հասարակությունը կարևոր դեր ունի մշտադիտարկման գործընթացում, ինչպես ազգային, այնպես էլ միջազգային մակարդակով: Ինչ վերաբերում է ազգային մակարդակին, Կոնվենցիան հստակորեն սահմանում է, որ քաղաքացիական հասարակությունը, մասնավորապես հաշմանդամություն ունեցող անձինք և նրանց ներկայացնող կազմակերպությունները, պետք է ներգրավվեն և լիարժեք մասնակցեն մշտադիտարկման գործընթացին (տես Կոնվենցիայի հոդված 33.3): Միջազգային մշտադիտարկման հետ կապված՝ մասնակից պետություններին հրավիրվում է պատշաճ ուշադրություն դարձնել հաշմանդամություն ունեցող անձանց և նրանց ներկայացուցնող կազմակերպությունների հետ խորհրդակցություններին և ակտիվորեն ներգրավելուն՝ պայմանագրային մարմնի համար փորձագետներ նշանակելիս (տես Կոնվենցիայի հոդված 34.3): Ավելին, մարդու իրավունքների միջազգային պայմանագրերի՝ մշտադիտարկում իրականացնող այլ մարմինների փորձը ընդգծում է այն կարևոր դերը, որը կարող է ունենալ քաղաքացիական հասարակությունը պարբերական հաշվետվությունների գործընթացում աջակցելու անհատներին անհատական հաղորդումներ ներկայացնելու և Կոմիտեին մարդու իրավունքների լուրջ կամ համակարգված խախտումների վերաբերյալ հավաստի տեղեկություն տրամադրելու հարցում:



Ի՞նչ է Կոնվենցիայի ստորագրությունը:


Կոնվենցիայի մասնակից դառնալու առաջին քայլը պայմանագրի ստորագրումն է: Պետությունները և տարածաշրջանային ինտեգրման կազմակերպությունները կարող են ստորագրել կոնվենցիան կամ կամընտիր արձանագրությունը: Պետությունը կամ տարածաշրջանային ինտեգրման կազմակերպությունները կարող են ցանկացած ժամանակ ստորագրել Կոնվենցիան: Կոնվենցիան կամ կամընտիր արձանագրությունը ստորագրելով՝ պետությունները կամ տարածաշրջանային ինտեգրման կազմակերպությունները նշում են իրենց մտադրությունը՝ ավելի ուշ պարտավորություններ ստանձնելու վերաբերյալ: Ստորագրումը նաև պարտավորություն է ստեղծում ստորագրման և վավերացման միջև ընկած ժամանակահատվածում ձեռնպահ մնալ այն գործողություններից, որոնք կխախտեն պայմանագրի առարկան ու նպատակը:






Ի՞նչ է վավերացումը:

Կոնվենցիայի կամ կամընտիր արձանագրության կողմ դառնալու հաջորդ քայլը վավերացումն է: Վավերացումը պետությունների կողմից ձեռնարկվող կոնկրետ գործողություն է, որն ազդարարում է կոնվենցիայում կամ կամընտիր արձանագրությունում առկա իրավունքներն ու պարտականությունները ստանձնելու մտադրությունը: Տարածաշրջանային ինտեգրման կազմակերպություններն իրենց համաձայնությունն են հայտնում կոնվենցիայով կամ կամընտիր արձանագրությամբ կապված լինելու «պաշտոնական հաստատման» միջոցով՝ մի ակտ, որն ունի նույն ազդեցությունը, ինչ վավերացումը:



Ի՞նչ է միացումը:


Պետությունը կամ տարածաշրջանային ինտեգրացիոն կազմակերպությունը կարող է նաև իր համաձայնությունը հայտնել միանալու ակտով կոնվենցիայով կամ կամընտիր արձանագրությամբ պարտավորված լինելու վերաբերյալ: Միանալն ունի նույն իրավական ուժը, ինչ վավերացումը: Սակայն, ի տարբերություն վավերացման, որին պետք է նախորդի ստորագրումը, միանալը պահանջում է միայն մեկ քայլ՝ միանալու փաստաթուղթը ի պահ հանձնել:



Ո՞րն է ՄԱԿ-ի քարտուղարության դերը Կոնվենցիայի առնչությամբ:

Միավորված ազգերի կազմակերպությունը ստեղծել է Կոնվենցիայի միասնական քարտուղարություն, որը բաղկացած է ինչպես ՄԱԿ-ի Տնտեսական և սոցիալական հարցերի դեպարտամենտի (DESA) աշխատակազմից, որը գտնվում է Նյու Յորքում, այնպես էլ Մարդու իրավունքների գերագույն հանձնակատարի գրասենյակից՝ (OHCHR) Ժնևում: Տնտեսական և սոցիալական հարցերի վարչությունն աջակցում է Մասնակից պետությունների համաժողովին, իսկ Մարդու իրավունքների գերագույն հանձնակատարի գրասենյակն աջակցում է Հաշմանդամություն ունեցող անձանց իրավունքների հարցերով կոմիտեին: Նրանք համագործակցաբար աջակցում են պետություններին, քաղաքացիական հասարակությանը և մարդու իրավունքների ազգային հաստատություններին Կոնվենցիայի իրականացման և մոնիտորինգի համար:






Ո՞րն է հաշմանդամության հարցերով հատուկ զեկուցողի դերը:

Հաշմանդամություն ունեցող անձանց իրավունքների հարցերով ՄԱԿ-ի հատուկ զեկուցողի մանդատը ստեղծվել է 2014 թվականին Մարդու իրավունքների խորհրդի կողմից՝ միջազգային հանրությանը տեղեկացնելու հրատապ խնդիրների մասին, որոնց բախվում են հաշմանդամություն ունեցող անձինք աշխարհի տարբեր մասերում, ինչպես նաև օգնել երկրներին լուծումների առաջարկներով:






Ինչպե՞ս է ընթացել կոնվենցիայի բանակցությունը:

Կոնվենցիան մշակվել է Հաշմանդամություն ունեցող անձանց իրավունքների և արժանապատվության պաշտպանության և խրախուսման համապարփակ և ամբողջական միջազգային կոնվենցիայի հանձնաժողովի կողմից (Ad Hoc կոմիտե), որը Միավորված ազգերի կազմակերպության Գլխավոր ասամբլեայի կոմիտե էր: Նրա անդամակցությունը բաց էր Միավորված ազգերի կազմակերպության բոլոր անդամ պետությունների և դիտորդների համար: Իր առաջին նիստի ժամանակ հանձնաժողովը որոշեց, որ հանձնաժողովում հավատարմագրված ոչ կառավարական կազմակերպությունների ներկայացուցիչները նույնպես կարող են մասնակցել հանդիպումներին և հայտարարություններ անել ՄԱԿ-ի պրակտիկայի համաձայն:

Հանձնաժողովն անցկացրել է ութ նիստ: Իր առաջին երկու նստաշրջաններում 2002 և 2003 թվականներին, Կոմիտեն քննարկեց հաշմանդամություն ունեցող անձանց իրավունքների վերաբերյալ միջազգային փաստաթուղթ մշակելու հնարավորությունը և քննարկեց փաստաթղթի տեսակը և հնարավոր տարրերը, որոնք պետք է ներառվեն: Իր երկրորդ նիստում հանձնաժողովը ստեղծեց աշխատանքային խումբ՝ կոնվենցիայի տեքստի նախագիծ պատրաստելու համար: Կառավարության և ՀԿ-ների ներկայացուցիչներից կազմված աշխատանքային խումբը հանդիպել է 2004 թ. հունվարին և մշակել տեքստ՝ բանակցելու համար: Հանձնաժողովն իր երրորդ, չորրորդ, հինգերորդ, վեցերորդ, յոթերորդ և ութերորդ նիստերում շարունակեց իր բանակցությունները: Կոնվենցիայի տեքստը վերջնական տեսքի է բերվել հանձնաժողովի կողմից 2006 թվականի օգոստոսի 26-ին:


Նախագիծը մշակող խումբը, որին հանձնարարված էր ապահովել տերմինաբանության միատեսակությունը կոնվենցիայի նախագծի տեքստում և ներդաշնակեցնել տարբերակները Միավորված ազգերի կազմակերպության պաշտոնական լեզուներով, վերանայել է տեքստը 2006 թվականի սեպտեմբերից մինչև նոյեմբեր:

Միավորված ազգերի կազմակերպության Գլխավոր ասամբլեան 2006 թվականի դեկտեմբերի 13-ին ընդունել է Հաշմանդամություն ունեցող անձանց իրավունքների կոնվենցիայի և դրա կամընտիր արձանագրության տեքստը:



Կոնվենցիայի բանակցությունների ընթացքում խորհրդակցություններ անցկացվել են տարածաշրջանային մակարդակով:

Տարածաշրջանային խորհրդատվական հանդիպումներ են անցկացվել բազմաթիվ տարածաշրջաններում և որոշ ենթատարածաշրջաններում 2003-2006 թվականներին: Խորհրդակցական հանդիպումները ներառում էին ինչպես Կոնվենցիայի գործընթացի և բովանդակության վերաբերյալ քննարկում, այնպես էլ տարածաշրջանային առաջնահերթությունների և հետևանքների վերաբերյալ երկխոսություն: Հանդիպումների արդյունքում ստեղծվել են առաջարկություններ, որոնք արտացոլում են ազգային, ենթատարածաշրջանային և տարածաշրջանային առաջնահերթությունները, որոնք նպաստել են հանձնաժողովի աշխատանքին:




Ո՞րն էր ՄԱԿ-ի հաշմանդամության կամավոր հիմնադրամի դերը Կոնվենցիայի բանակցություններում:

Բանակցային գործընթացի ընթացքում ՄԱԿ-ի Հաշմանդամության կամավոր հիմնադրամն աջակցել է զարգացող երկրների հաշմանդամություն ունեցող անձանց կազմակերպությունների ներկայացուցիչների մասնակցությանը և, մասնավորապես, ամենաքիչ զարգացած երկրների, հանձնաժողովի նիստերին:

Կամավոր հիմնադրամի դրամաշնորհները նպատակաուղղված էին Կոնվենցիայի խթանման և իրականացման շուրջ պիլոտային և նորարարական գործողություններին աջակցելու համար:





Ինչպե՞ս է ապահովվել բանակցային փաստաթղթերի մատչելիությունը:

Բանակցային գործընթացի ընթացքում մատչելիության ապահովման մեթոդները ժամանակի ընթացքում ավելի կատարելագործվեցին: Մեթոդները փոխվել են ընթացքում սկավառակներից և բրայյան թղթերից մինչև համացանցային կայք: Կայքը համապատասխանում էր Վեբ բովանդակության մատչելիության ուղեցույցի (WCAG 1.0) A մակարդակի ստանդարտներին: Ի թիվս այլ առանձնահատկությունների, մատչելիության այս մակարդակը թույլ է տվել աջակցող տեխնոլոգիաներ օգտագործողներին արդյունավետ օգտվել կայքից: Կոնվենցիայի տեքստի բանակցային աշխատանքային փաստաթղթերը տեղադրվեցին կայքում հենց որ դրանք քննարկվեցին հանձնաժողովի նիստի ժամանակ, ինչը նորարարական պրակտիկա էր ՄԱԿ-ի կոնվենցիայի բանակցությունների համար: Այդպիսով, վեբկայքն ակնթարթորեն հնարավորություն ընձեռեց ամբողջ աշխարհի խմբերին ժամանակին և ճշգրիտ տեղեկանալ բանակցությունների մասին:

Բացի այդ, ՄԱԿ-ի Նյու Յորքի կենտրոնակայանում գտնվող կոնֆերանս սենյակը, որտեղ բանակցություններ էին ընթանում, WiFi-ով համալրվեց բանակցային գործընթացի կեսին: WiFi-ը թույլ էր տալիս սենյակում գտնվող անձանց Էլեկտրոնային եղանակով մուտք գործել և կարդալ քննարկվող փաստաթղթերը՝ անհրաժեշտության դեպքում աջակցող սարքերի միջոցով: Հանձնաժողովի բոլոր նիստերն անցկացվել են սայլակով տեղաշարժվող մարդկանց համար մատչելի կոնֆերանս սենյակում, և լսողության խնդիրներ ունեցող անձանց պահանջով տրամադրվել են ձայնի ուժեղացուցիչներ:

